

安

楚

錄

此乃一因舊藏中錄凡二部合之者缺卷一之二
書招搖式幡衣共一處名書利貞其一處文作
忠行也諸家自中只說此者此今亦不覺必無
事三年可補余之憾也 瑤已亥年九月

安楚錄卷一

勅諭

皇帝勅諭都察院右副都御史秦金今命爾巡撫湖廣地方兼贊理軍務操練軍馬整飭邊備撫治民夷提督屯田預備糧儲禁革姦弊防察姦宄遇有賊寇生發隨卽剿滅若遇歲荒民饑務須設法賑濟官吏有能奉公守法修舉政務者量加獎勵其貪酷不才害人誤事者從實黜罰其軍民詞訟若有告訐賊私等項事情干礙軍職及文職五品以上者具奏拏問其餘就便拏送所司問理其有便於軍民者聽爾從宜處置凡一應軍機重務悉與鎮守太監總兵等官同心

協和計議停當而行爾爲憲臣務體朝廷憫念
軍民之意持廉秉公正已率下興利除害撫卹
軍民俾地方寧靖人民安妥庶副委任如或處
事乖方責有所歸爾其如勅奉行故諭

勅命

正德九年十二月初六日

之實

勅巡撫湖廣都御史秦金先因營造乾清坤寧二官
工程重大該用木植錢糧物料等項數多該部
已奏請差官前往湖廣四川貴州等處採辦大
木運解應用其餘一應合用錢糧并帶徵工價
銀兩及做工人匠等項亦已經派行浙江等布

政司并南北直隸府州徵解去後今該部奏稱
已經一年之上止有直隸河間保定二府并浙
江紹興河南開封陝西西安等府解到一二其
餘各處俱未見解到欲將各該違慢官員查究
治罪朕念地方遙遠又係初犯姑且容恕記罪
今再勅爾等知會務要用心嚴督所屬布按二
司掌印并守巡官及府州縣經該官員各將原
派物料人匠并帶徵均徭銀兩自勅至之日爲
始定限三箇月以裏追徵完足各差司府佐貳
官員帶領殷實大戶依限星馳押解前來接濟
大工如再仍前故違半年之上者聽將司府州
縣掌印正官住支俸糧一年之上者革去冠帶

遇缺不許推陞直待事完方許支俸冠帶一年
半之上者叅提問罪奏請降黜若有限內通完
者指實旌擢每季終各將督解過銀兩物料人
匠數目委官職名起程日期先行奏報以憑稽
考務使錢糧不誤大工易成而違慢官吏知所
警懼爾等如或仍前姑息亦不能辭罪其欽承
之母忽故勅

廣運

正德十一年二月十八日

之寶

勅巡撫湖廣地方兼贊理軍務都察院右副都御史
秦金得爾奏稱都黎等處數百寨苗賊妄言氣

數聚衆攻城殺官料惑香爐山叛苗阿皆等乘
機倡亂截路劫殺前項地方與貴州清平興隆
等處接界今命爾及總兵官楊英前去鄰近地
方駐劄會同貴州總兵都御史各提督叅將守
備三司等官整備兵糧相機撫剿中間動調官
軍土兵等事公同計處得宜其湖廣錢糧照依
該部奏准事理隨宜督理勅內該載未盡者亦
聽爾等便宜而行事體重大者奏請定奪爾爲
大臣受茲委任宜竭心殫力展布才猷務使地
方無虞軍民安靖庶副簡命之意如或怠玩誤
事責有所歸爾其欽承之故勅

廣 運

正德十一年七月二十七日

之寶

勅巡撫湖廣地方兼贊理軍務都察院右副都御史
秦金見今湖貴隣界去處苗賊爲患已命爾及
總兵官統領官軍土兵會同貴州合兵征剿朕
念軍馬所在糧草爲先特命爾不妨巡撫軍務
兼督軍餉爾宜照依該部題准事理督同三司
管糧等官隨宜措置多備糧草於各緊要城堡
收貯聽主客兵馬支用軍兵所至隨宜供給三
司以下軍衛有司官員敢有違慢不服委用及
管軍頭目人等作弊支費沮撓等項應拏問者
拏問應叅奏者叅奏尤宜悉心經理處置得宜

使軍儲不乏士氣振揚斯爲爾能如或乖方誤
事實有所歸爾其欽承之故勅

廣運

正德十一年七月二十八日

之寶

勅鎮守湖廣太監杜甫巡撫都御史秦金巡按御史
張翰先該榮王府第被火延燒已命內官監太
監李文前去湖廣會同爾等各該司府官員計
處修理後本府寢宮等項房屋旣已蓋造完備
該李文具奏回京間又該榮王奏欲將已派未
徵餘銀修葺門廊房屋朕以李文尚在彼處又
命公同爾等併工修完其未徵銀二萬餘兩着

巡撫官於內量徵應用今特命爾等照依前旨
并今勅內事理會同李文從長議處督同司府
以下各該官員於前項餘銀數內量徵一半或
三分之二將該府未完門廊房屋上緊併工修
完通併造冊奏繳以憑查照不許因循怠玩虛
費工力亦毋得於數內多徵加派重貽民害以
致激生他變如違必罪不宥爾等其慎之慎之
故勅

廣 運

正德十一年八月十六日

之 寶

勅巡撫湖廣地方兼贊理軍務都察院右副都御史

秦金得太監杜甫與爾及都督同知楊英奏湖
廣劇賊賀璋廖琪薛鵠子等凶惡狡猾劫獄殺
人既招復叛已踰數年騷擾郡邑荼毒軍民罪
大惡極久未克除爾等乃能督率官吏指授方
畧盡將璋等諸賊一一擒斬餘黨解散潛消禍
亂地方獲安朕甚嘉之茲特降勅獎勵仍賞銀
二十兩紵絲四表裏以旌爾勞其有功官吏人
等俱已量加賞勞旌表尚念一方赤子久遭毒
害爾宜加意撫綏務俾各安生業地方永寧斯
稱朕委任至意欽哉故勅

廣 運

正德十一年十一月十六日

之寶

勅巡撫湖廣等處地方兼贊理軍務都察院右副都御史秦金先該太監總兵官及爾各奏廣東徭賊流劫湖廣安仁攸縣執辱縣官殺害居民劫燬獄囚衙門勢甚兇惡又該爾等奏湖廣郴州與廣東江西接壤有名賊首龔福全等先雖撫處變詐不常今又與廣東徭賊互肆猖獗乞要征剿該兵部前後議奏謂賊徒搶殺醞釀日久守土官徃徃隱匿已行防剿及查欺隱官員叅問爾等具奏又行整兵撫剿反加滋蔓誤事各官本當重治但念緊急用人姑從寬住俸殺賊令爾等會兵剿賊以靖地方朕皆從之茲特命

爾等前去郴桂征剿前賊爾宜督同三司掌印
及兵備守備守巡管糧叅將等官整理兵糧協
心幹濟嚴督鎮溪等處土軍馬湖陽山殺手衡
州長沙茶陵等衛班軍附近敢勇分布無城縣
分通賊要路防禦剿捕臨陣之際敢有違誤者
都指揮以下聽以軍法從事其調到土軍經過
住劄地方嚴加禁約敢有騷擾凌辱官司強奪
姦污等項聽爾從宜處治三省官軍分道並進
相機遏剿其兩廣并南贛鎮巡等官或親臨邊
境或差官領兵策應事有應與計議者俱要會
合計議毋得自分彼此推託誤事凡事俱照兵
部議擬奏准事理施行其征進貴州官軍已命

副總兵李瑾更替統領彼處事宜亦須通理爾等受茲委任宜盡心竭力大建厥功以紓朕南顧之憂以解民倒懸之苦如或因循玩愒致誤兵機國典具存必不輕貸爾其欽承之故勅

廣運

正德十二年六月初三日

之寶

勅巡撫湖廣地方兼贊理軍務都察院右副都御史秦金得爾奏郴桂徭賊龔福全劉福興等嘯聚山林恃險負固僞稱大王總兵名號肆行兇惡攻城破縣劫財殺人流毒三省地方爾等乃能遵奉勅旨督同守巡兵備等官調集官軍土兵

人等分哨並進設法剿捕生擒首惡并剿從賊
三百四十五名斬獲賊級一千六百四十五顆
俘獲賊屬男婦一千五名口及奪獲頭畜器械
數多巢穴既平餘黨悉滅累年之患一旦掃除
自非爾等同心協謀調度有方何以致此捷奏
來聞朕心嘉悅除有功人員命該部查議陞賞
外茲特陞爾俸一級廕子爲世襲百戶仍降勅
獎勵以旌爾勞朕尚念盜賊甫平居民未盡安
堵爾等尤宜用心撫卹務使軍民樂業地方永
保無虞斯副朝廷委任至意爾其欽承之故勅

廣運

正德十三年三月十六日

之實

勅巡撫湖廣等處地方兼贊理軍務都察院右副都御史秦金近該南京內外守備叅贊等官太監黃偉等先後奏報江西寧王殺害巡撫等官燒燬府縣肆行反逆等項事情已下兵部會官議處停當朕當親統六師奉

天征討先差安邊伯朱泰爲前哨統領各邊官軍前去南京相機剿殺太監張忠左都督朱暉統領各邊官軍前去江西擒其巢穴又命南和伯方壽祥及南直隸江西湖廣各該鎮巡等官各照擬定要路住劄把截今特命爾照依該部會奏事理會同鎮守太監李鎮總兵官安遠侯柳文

選調堪用官軍民快親自督領前去所屬緊要
地方通連江西道路去處分布防禦軍中事宜
務要互相傳報彼此通知一遇有警勿誤策應
或就便會合各路人馬設法剿捕仍出給榜文
告示遍發江南及各該地方張掛曉諭但有人
聚集義兵擒殺反逆賊犯者量其功績大小封
拜侯伯及陞授都指揮指揮千百戶等官世襲
賊夥內有能自相擒斬首官者與免本罪仍量
加恩典不許乘機挾讐妄殺平人一應軍中事
宜勅內該載未盡者俱聽爾隨宜區處爾爲風
憲大臣受茲重託宜罄竭忠誠掃除叛逆尤要
詳審慎重計出萬全務俾地方寧靖軍民安堵

以紓朕南顧之憂庶稱委任爾其欽哉故勅

廣運

正德十四年七月二十八日

之寶

勅巡撫湖廣等處地方兼贊理軍務都察院右副都御史秦金爾與鎮守太監李鎮總兵官安遠侯柳文巡按御史毛伯溫及三司等官一聞宸濠反叛隨卽差人具奏同心協謀選委官屬統領官軍民兵前去蘄州并興國州等處駐劄防禦又徧諭所屬固守城池盤詰姦細召募義勇措置糧餉將見在水次兌軍糧米諭令般入附近堅完城內收貯以備緊急之用近又會議請兵

會合剿殺或直搗其虛或追躡其後或犄角夾
攻期在旦夕罪人必得忠憤激烈計慮周詳足
見勤誠體國至意朕心嘉悅特降勅獎勵爾等
尚益展才猷遵照原奉勅旨用心區處務在防
禦有備進剿得宜成功之日朝廷自有恩賚爾
等其欽承之故勅

廣運

正德十四年九月初十日

之寶

安楚錄卷二

奏疏

欽差巡撫湖廣地方兼贊理軍務都察院右副都御史秦題爲地方事據湖廣都布按三司并各道守巡等官各將議處過事件備陳到臣據此案照先准兵部咨該本部題合無查照節年事例行移遼東宣府大同山西延綏陝西寧夏甘肅四川湖廣鄖陽兩廣江西貴州雲南山東巡撫總督撫治等官今年俱免赴京議事各在地方修舉本等職業撫恤軍民防捕盜賊若有重大應議事件益於政體便於軍民者預先條陳差人齎奏照依舊例聽該衙門會議奏

請施行若係見行并已有奏行事例及瑣屑常事應該自處者從宜申明舉行不須一一煩瀆塞責等因題奉

聖旨是欽此欽遵備咨到臣已經案行都布按三司掌印并各道守巡等官通行議處開報去後今據前因看得各官所議各項事件除瑣屑常事并有例見行臣已斟酌申明一一舉行外其有益於政體便於軍民事關重大非臣所敢擅專者復詢之輿情叅以已見增補其所未備潤色其所未宜開列條件上請定奪施行爲此具本正德十年六月二十九日專差承差趙相親齎謹題請

旨

計開

一添府官以督邊倉查得湖廣布政司所轄沿邊銅鼓伍開清浪平溪偏橋鎮遠天柱等倉俱坐落貴州所屬黎平等府地方大庸永定安福九溪施州雖與岳州府慈利荊州府巴東等縣相連其實與四川酉陽諸夷相通錦田桃川枇杷雖與永州府永明等縣相近其實與廣西平樂府地里相攙遠者六七百程近亦三四百里山洞峻深夷夏雜處攻侵之患歲時常有設衛而備隨險各宜故以近邊荊岳辰常長衡永寶郴靖等府州夏秋稅糧

每歲各照歲支數目坐派一十七萬三千九百餘石本色折色中半徵收運赴各該倉庫交納以備供用前時法嚴人淳姦弊鮮少所以歲用充足倉有餘積近年以來規利之徒紛紜肆出加以頑民憚於遠運往來通同糧運大沮或豪強官舍差人遠至包攬或姦頑糧里令人潛去通結彼此各加扣落上倉任意遷延官攢被其餌愚高下隨伊張王間有一二畏法無奈官舍人衆地限邊方上司巡歷一時未到文移往返動經數月近日各倉申稱各衛官員有將席價收去倉廩不行修理有縱舍餘攬糧強橫難以禁治雖經累行

查究終是積稔不悛若不大爲計處邊倉缺乏不止今日後將大有可憂者查得岳州府澧州原設判官一員專以提督大庸等倉但官隸於州就於州內居住惟歲時巡歷官小人橫縱有若無況一年纔及一次何以能濟其事爲今之計乞

勅該部從長計議合無將澧州原設管糧判官革去比照宣府事例各照地方添設通判共二員先令各府掌印管糧官將應有邊倉去處逐一委官踏勘某倉與某倉相去地里若干某處較某處適中堪以建設公館如銅鼓伍開清浪平溪偏橋鎮遠天柱則隸辰州府大庸

永定安福九溪則隸岳州府俱於適中去處
公館住劄往來不時巡歷倉庫一應事宜俱
許經管但有包攬之徒似前縱橫不問軍民
舍餘徑自拏問官攢人等若有通同作弊不
畏禁例亦許徑自提問輕則隨宜發落重則
舉呈撫按守巡管糧衙門施行其附近衛所
屯田子粒協同管屯官徵收鄰近州縣應辦
錢糧就令帶管各項詞訟亦許管理應得馬
夫柴薪等項如離府寫遠就令各倉於蓆價
糧銀內關支桃川錦田枇杷三倉施州一倉
地方不遠合無就令永州荊州二府分管官
一年一次往來督察畢日具將督察過姦弊

擒拿過攬頭緣由姓名一體呈報撫按等官稽考如此則事得專一人知所警積弊可革而邊儲有賴矣

一設關吏以謹防禦竊惟關隘之設所以控扼東西南北之衝抑沮盜賊姦宄之計有事當關而守無事安枕而眠思患預防不可不備照得湖廣德安府所屬應山縣西北五十里有黃土關峻嶺曲徑難通車馬北五十餘里有恨這關兩山夾峙巉巖壁立東六十餘里有武勝關絕壁相向中頗平坦居民百十餘家三關之險恨這武勝爲衝要在所當急黃土爲偏僻在所當緩頃年法度廢弛人心玩

惕戍卒失伍離次重門無稽察之防居民伐木誅茅小徑有驅馳之捷遂使關隘之險闕爲坦途以故往者巨寇劉六等來不自三關而自廣水店去不自三關而自孟畝侵入我疆圍殺掠我人民是險有不足恃而患有不可救者矣况湖省地方節年荒旱民不聊生加以工役繁興科需橫溢民窮財盡莫甚斯時萬一草寇竊發如有劉六輩復起鼓行而來內應外合何以禦之爲今之計乞

勅該部從長計處合無將恨這武勝二關各添設巡檢衙門一所照例銓官撥吏建立公廨僉撥弓兵守把隘口盤詰姦細庶關津不爲虛設

而地方有所倚賴矣

一減差內臣以靖地方切照湖廣均州自永樂年間營建武當山宮觀之後

勅布政司叅議一員督同均州千戶所官軍提督山場修理宮觀于時差遣未有內臣也宣德以後始差左監丞一員提督本山正統年間又止差禮部郎中布政司叅議等官提督自景泰元年至成化元年雖差遣內臣更替迭換亦止以提督本山修理洒掃爲名未聞有分守地方之責其供給之費役使之人太率以撙節爲事未聞累及有司編派成化十二年因鄖陽地方流民囂聚爲患由是憲臣建議

設湖廣行都司等衙門太監韋貴原差提督
本山遂兼分守地方行令均州編僉門阜亦
未聞有再差協守地方之官也自是以後差
協同提督山場太監一員又行令有司加添
門阜一百名差遣相望供費不貲而地方始
告病矣竊謂本山宮觀百餘年來廟貌森嚴
壇宇整飭皆

太宗之訐謀大策實足以綿永遠香火之計縱有損
壞該修理者不過十分中二三爾均州守禦
千戶一所在官無漕運往來之勞在軍免屯
田辦納之費不爲別項差占專供本山修理
洒掃旣

勅太監一員又布政司叅議一員兼同提督亦云足矣且荆襄鄖陽及附近河南內鄉陝西商州白河等處地方今奉

勅差有撫治都御史以統於上并添設行都司及鄖陽衛所以協理於下太監提督本山又兼分守其土一或有警聽令調遣專行獨濟不患無功何必又差一員協守其事乎卽今鄖襄等處地方連年薄收軍民告窘以一州之小治置立分守協守兩處衙門供給之費不勝浩繁况夫間井蕭條凋瘵日甚以有限之財力供無涯之科需則又何取於地方之便哉如蒙乞

勅該衙門計議查照成化十二年事例止設分守太
監一員不妨原管事務督令地方操練官軍
民壯修理城堡器械撫恤軍民禁約流逋其
續設協守一員就行裁革以蘇軍民之困地
方幸甚及照武當山每年香錢所獲數多誠
恐委官不得其人不免爲侵牟之計仍乞聽
提督分守叅議委官一員兼同均州千戶所
委官收管一出入稽考數目除修理官觀
之外其餘剩之數如山東泰山香錢開報本
布政司解庫亦可以克

國家別項支用實爲便益

一裁革多官以省冗費嘗聞設官以分治固各

有職業之常事少而官多則不可無損益之制查得鄖陽地方舊時止有鄖鄉一縣成化年間因各處流民逋聚乃爲撫安之計增置鄖陽一府止設知府一員撫民通判一員推官一員近又增設同知一員管糧通判一員府分有大小錢糧有多寡鄖陽府所屬七縣夏稅秋糧不過二萬有零比之大府不過十中之一委之各縣正官亦足濟事及查沔陽州河泊所原設三十一處正統年間該湖廣右布政使蹇賢奏稱河泊所衙門課鈔不及四千貫麻鐵不及一萬斤翎毛不及一萬根該州照例裁革八所將長下等河泊八所歸

併水口相連小港等河泊八所帶管納課存
留原舊黃蘗等湖一十五所共二十三所今
又查得原舊數內許家池河泊所錢糧數少
又與黃蘗湖水口相連賽港湖河泊所業甲
貧難又與直步湖河泊所地方甚近爲今之
計乞

勅該部計議合無將鄖陽府通判革去一員存留一
員不妨捕盜兼以管糧及將黃蘗湖賽港湖
二所照依前項事例歸併則庶幾無官多民
擾之病有兼任責成之益地方幸甚

一處邊衛軍職以便行事照得湖廣都司所屬
沅州靖州銅鼓伍開平溪清浪偏橋鎮遠八

衛俱係邊境與貴州地方犬牙相參如五開
衛則與黎平府鎮遠衛則與鎮遠府俱同處
一城偏橋衛與興隆衛相去不過六十里各
衛指揮等官犯罪該道守巡等官咨關總司
叅提往返之間動以歲計甚至有三年之久
不奉勘合者以此各衛官員全然不以叅提
爲意嘗言待得叅下來時不知過了幾遭

赦宥况各官雖不知警於一時亦終貽累於後日叅
提之後不問笞杖罪名住俸問罪終無所逃
查得問刑條例內一款雲貴軍職犯該笞杖
罪名不必奏提有俸者照罪罰俸無俸者罰
米其徒流以上情重者仍舊奏提爲今之計

乞

勅法司計議合無比照雲貴事例凡八邊衛軍職有犯笞杖罪名許守巡兵備等官具呈巡撫巡按衙門就行罰俸罰米如有入官給主等賊照數追徵如此庶邊官知警上不煩瀆天聽下不積滯案牘矣

一處軍職以嚴事例照得湖廣都司所屬沅州靖州銅鼓伍開平溪清浪偏橋鎮遠八邊衛與貴州廣西四川地界聯絡百種苗蠻自古爲患實爲雲貴血脈湖藩障蔽要害之地今各衛軍士日漸消耗不及原額十分之一且如伍開衛原額五萬今止三千銅鼓衛原額

一萬八千今止八百今較十年前又十去
其一二自此通降數十年後將獨存空城誰
與爲守

朝廷專設官職清理軍伍各衛所勾到新軍累
累不絕奈何官旗人等不肯存恤反加虐害
或指買辦火藥軍器或指紙劄拜見禮物百
計科害囊資既盡月糧無得不能存活只得
逃回又有聞知解軍將到前去中途邀截剝
取財物私出批文通同賣放其弊多端難以
枚舉查得問刑條例內一款若一年之內求
索財物因而逼累在逃者指揮十名以上千
戶鎮撫六名以上百戶四名以上各問罪降

一級每十名六名四名各照數遍降不及前數及不曾得財者照常發落立例雖嚴但因有不曾得財者照常發落字句以此害軍之官不知警戒且軍旣在逃事無對證據其一偏之說豈肯輸情認賊如蒙乞

勅該部計議合無申明前例但凡逃軍滿數卽坐降級仍令各衛經歷司置簿一扇在官遇有解到新軍隨卽註寫某年月日某處解到某所某千戶某百戶下軍人某人年貌妻某氏某月日出給收管批迴每季終將簿申送該道兵備官處查驗每年終查點一次備開逃軍名數具呈撫按衙門類總叅

奏提問軍逃滿數者照例降級不及數者問擬應得罪名如解到新軍百戶至十名以上千戶鎮撫至十五名以上指揮至二十名以上並無一名在逃者量加旌獎歲以爲常如此庶軍伍可克而邊方有賴矣

一訂法令以清倉場訪得湖廣各處倉場近年姦弊益甚蓋因數年以來倉廩空虛軍無見糧一領籌票輒求售賣官豪及積年買頭人等乘時射利每月糧八斗多則得價一錢少則七八分或五六分遇有軍民運攬糧米到境官攢買頭彼此交通就將籌票扣抵倉糧虛出通關硃串徵之取盡膏脂給之絕無顆

粒百餘年來

國家養士之規一旦蕩而爲姦豪肥家之計累經懲治竟莫悛改查得問刑條例一款在京在外一應收放糧草去處職官子弟積年光棍跟子買頭小脚跟官伴當人等三五成群搶奪籌斛占堆行槩等項打攪倉場及欺凌官攢或挾詐運納軍民財物者杖罪以下於本處倉場門首枷號一箇月發落徒罪以上與再犯杖罪以下免其枷號屬軍衛者發邊衛屬有司者發附近俱永遠充軍今照積年買頭人等買籌扣抵倉糧多者二三百石少者不下四五十石獲利既多被害亦衆較之

搶奪簪斛占堆行槩之罪頗加深重而條例不載卒難深治爲今之計乞

勅法司計議合無比照前例買頭人等犯該徒罪以上者照依前擬充軍官員有犯每買簪五十石遍降一級降至三級而止則法令嚴而人心懼宿弊革而邦本固矣

一處置苗民以保地方照得寶慶府武岡州儒林等鄉有猺苗二種原聽城步巡檢司管轄弘治十四年苗叛克平弘治十七年設立城步縣撥儒林等鄉猺苗奏里屬縣其巡檢司在城步縣前仍隸武岡州緣城步縣深居夷境一城之外皆是夷人猺苗性類犬羊不知

法度稍拂其性輒合款打條挾衆歸州不許
歸縣蓋由縣官勢孤力寡致其易視雖有巡
檢司弓兵人役不聽操點調用雖有一所官
軍地方懸隔溪嶺崎嶇上司罕到皆溺安嗜
利無有統紀萬一夷性變動縣官何以控制
爲今之計乞

勅該部計議合無將巡檢司改隸城步縣聽其操點
差使仍查照邊方城池事例該所錢糧軍馬
俱聽縣官協同料理庶幾徭苗畏威不敢梗
化又苗糧原額該一百餘石殘苗不肯輸納
負累里遍包陪苗人種類易蕃往年禁買民
田終不可禁收買漸多亦只依舊納丁田苗

糧不當雜差姦民規便因而詭寄苗里靠損
良民今後通令其但買民田者卽當民差
仍立石碑爲信庶幾苗有常產服役官府而
革心向化亦可望矣

欽差巡撫湖廣地方兼贊理軍務都察院右副都御
史秦 題爲工役繁興科徵太急恐生地方他
變事據湖廣布政使司呈前事伏乞轉達具奏
施行等因到臣據此卷查正德八年八月內先
爲

開讀事該內官監太監等官李文等欽奉

勅諭修造

榮王府第已該前巡撫湖廣右副都御史劉內會

行估計動支錢糧委官督工修造及坐派軍民
夫匠工價通融折徵銀兩并查取軍餉等銀轉
數解赴常德府收庫支用修理正德十年三月
內該臣接管巡撫隨卽轉行該道守巡等官查
催完工造冊繳報續據分巡湖北道僉事丁沂
呈稱

榮府前後寢宮虎座穿堂宮門等項督工修造俱
已完畢及繳常德府開造文冊前來查得支用
過物料工價匠作等銀共八萬八千一十九兩
三分九釐六毫見在餘剩銀一百六兩五分八
釐黑鉛黃麻等料約計銀一千八十一兩三錢
有零貯庫案候在卷正德十一年四月初六日

臣節該欽奉

勅先該榮王府第被火延燒已命內官監太監李文前去湖廣會同爾等并各該司府官員計處修理後本府寢宮等項房屋旣已蓋造完備該李文具奏回京間又該榮王奏欲將已派未徵餘銀修葺門廊房屋朕以李文尚在彼處又命公同爾等併工修完其未徵銀二萬餘兩著巡撫官於內量徵應用今特命爾等照依前旨并今勅內事理會同李文從長議處督同司府以下各該官員於前項餘銀數內量徵一半或三分之一將該府未完門廊房屋上緊併工修完通併造冊奏繳以憑查照不許因循怠玩虛費工

力亦毋得於數內多徵加派重貽民害以致激
生他變如違必罪不宥欽此欽遵已經通行都
布按三司一面行催所屬未徵夫價銀兩上緊
解用一面坐委守巡等官叅議王蓋僉事謝廷
柱等公同太監李文督工修理完報去後今據
前因臣會同鎮守湖廣地方御馬監太監杜甫
巡按監察御史張翰議照

榮王府第前後寢宮穿堂虎座宮門等項俱已造
完止有門廊房屋未修工程不爲浩大若能撙
節用度得銀數千餘兩亦自足勾先次

榮王奏要止令守巡等官葺理不必久留內外官
員意正有見於此臣等伏覩近奉

勅旨有云毋得數內多徵加派重貽民害以致激生
他變仰窺我

皇上明見萬里軫念百姓之心雖堯舜亦不是過今
太監李文自南京復回湖廣又出案驗要行加
派夫匠那借官銀殊非

朝廷節用恤民之意且本官先在常德數年供給
之繁難下人之騷擾有難盡言軍民聞其復來
舉皆疾首蹙額恐其重加困累切緣湖廣地方
連歲災盜兵荒公私匱乏已極額辦之稅糧方
徵坐派之物料迭繼平時既多各項軍需去年
又造綾紗紙劄

壽府用銀補修殿宇

岷府起夫拽運木植加以

楚遼荆襄等府郡王將軍宗枝蕃衍婚禮喪葬房屋等價增派歲無虛月百姓脂膏腹削殆盡司府官庫搜括無遺目今

朝廷營建

宮室最爲緊要急務採木起運合用解戶水手人夫數多大壽大絲等料人匠等價帶徵均徭銀兩動數十萬計匠等分當督屬極力營辦時刻不敢有違其

榮府寢宮旣已完工未修廊房似應少緩且未徵價銀一萬三千九百八十三兩七錢有零俱在困窮軍民拖欠見今差官守催難免逼迫逃竄

况五月初旬至今天雨連綿江水泛漲田禾廬舍盡被渰沒秋收無望人心驚惶怨聲載道兼以清平叛苗擾害邊境榔桂徭賊劫殺鄉民見議用兵征剿軍餉百無一備民窮盜起理勢必然將來意外之虞又有不可逆料者臣以庸愚待罪巡撫民生休戚地方安危皆臣莫大之責苟於此循默不言致生他變咎將誰歸所據該司議呈前因情亦懇惻切至如蒙伏望

皇上俯念地方狼狽軍民困苦乞

勅太監李文帶領官匠人等回京前項

府第未完工程合無姑候採運大木完日另議興工修理惟復照依

榮王先奏事理止令臣等嚴督守巡等官陸續徵
銀次第完工回

奏緣係工役繁興徵科急迫乞取修府內臣以安
地方事理未敢擅便爲此會本正德十一年六
月十六日專差承差李文簡親齎謹題請

旨

欽差巡撫湖廣地方兼贊理軍務都察院右副都御
史秦 題爲照舊存留起運錢糧補支

王府祿米邊倉軍餉事據湖廣布政使司呈前事
伏乞照詳鈞裁等因到臣據此卷照先准戶部
咨該巡撫貴州右副都御史蕭紳題爲地方缺
乏錢糧急處以備不虞事奉

聖旨戶部知道欽此本部議得湖廣四川地方近年
凋弊已甚正宜休息撫安恐難設法勸借亦無
在庫銀兩可以那借及補還正德五年支取之
數合無通行川湖二省巡撫都御史嚴督布政
司掌印管糧分守等官查勘遞年坐派起解貴
州錢糧小民拖欠例該蠲免者照例保勘具奏
蠲免已徵在官侵欺埋沒者依律究問追陪起
解應徵不免者照依律限催徵起解通將查勘
過已未完數目并應否徵免緣由分豁明白造
冊

奏繳等因覆題奉

聖旨是欽此欽遵備咨到臣已經行據該司呈繳查

勘過長衡郴等府州所屬州縣原派起運貴州折糧銀兩自弘治十二年起至弘治十七年止未完獲通關并見徵起解被盜借解小民拖欠災傷遇例蠲免數目文冊并不扶結狀前來覆查相同具本

奏繳及咨部查照分豁外今據前因臣會同鎮守湖廣地方御馬監太監杜甫巡按監察御史張翰議照湖廣地方委的先因各邊用兵繼之頻年旱澇近又以營建採辦修蓋府第夫匠料價等項科徵浩繁在倉庫則極其空虛在軍民則極其困累計稅糧則額徵有限論公用則取給無窮其各

王府歲支祿米及邊近衛所官軍月俸呈申缺乏
歲無虛月臣屢批該司計處無從區畫補給蓋
額徵稅糧歲用項下尚欠一十二萬九千有零
官軍折俸鈔銀又有六七年不得關支衛所况
今偏鎮等邊苗賊出沒不常郴桂等處徭賊劫
虜爲患見行議處用兵軍餉動以數十萬計無
所仰給查得布政司先年起運貴州折糧銀三
萬七百二十兩該前巡撫湖廣都御史韓重爲
因本省歲用錢糧不敷奏奉

欽依存留司庫備用自弘治十八年到今完解之數
俱已支盡其餘拖欠節年災傷例免數多正德
八九十年分未完見今併徵民甚不堪若將前

項折銀仍令起解貴州則湖廣急缺軍餉別無措處進止機宜失誤非細况五月至今淫雨彌旬湖田被沒秋成已不可望則連年欠缺各王府祿俸等糧又將何所補給所據該司呈乞照舊存留折銀備用一節實非得已臣以菲才濫膺重託晝夜焦勞莫知善後之圖如蒙伏望

皇上軫念地方凋弊錢糧匱乏乞

勅該部查照將前項奏留起運貴州折銀照舊永存本省以備支用及行貴州巡撫官知會免其再行奏討如此庶幾軍餉得少資目前之急祿俸亦可充日後之需地方官民不勝幸甚緣係照舊乞留派運錢糧以補缺乏事理未敢擅便爲

此會本正德十一年六月十六日順差承差李
文簡親齋謹題請

青

欽差巡撫湖廣地方兼贊理軍務都察院右副都御
史秦 題爲地方事據湖廣都布按三司并各
道守巡等官各將議處過事件備呈到臣據此
案照先准兵部咨本部題合無查照節年事例
遼東宣府大同山西延綏陝西寧夏甘肅四川
湖廣郎陽兩廣江西貴州雲南山東巡撫總督
撫治等官今年俱免赴京議事各在地方修舉
本等職業撫卹軍民防捕盜賊若有重大應議
事件益於政體便於軍民者預先條陳差人齋

奏照依舊例聽該衙門會議奏

請施行若見行并已有奏行事例及瑣屑常事應該
自處者從宜申明舉行不須一一煩瀆塞責等
因題奉

聖旨是欽此欽遵備咨到臣已經案行都布按三司
掌印并各道守巡等官通行議處呈報去後今
據前因看得各道官議呈各項事件除瑣屑常
事并有例見行臣已斟酌申明一一修行外其
有益於政體便於軍民事關重大非臣所敢擅
專者臣復詢之輿情叅以已見增補其所未備
潤色其所未宜開列條件上

請定奪施行爲此具本正德十一年六月二十六日

謹題請

旨

計開

一復添官以便分守照得湖廣布政司所屬武漢黃沔等一十八府州分隸武昌上湖南下湖南湖北上荆南下荆南六道每道該分守官一員該司額設左右布政使二員左右叅政二員左叅議一員右叅議三員共八員內左布政使掌印右布政使清軍右叅議一員奉

敕專一管糧一員提督太嶽太和山并分守下荆南道兼管撫民外四員分管五道每年一員輪

進

萬壽賀表往返半年之上纔得任事去年一員抄造綾紗紙劄中間又有陞遷事故不一往往一員帶管分守二道甚至三四道者緣湖廣地方幅幘萬里境接八藩比與各布政司不同巡歷既不能周未免顧此失彼縱使各官終歲在外亦不過虛文往來苟且塞責錢糧比併鮮完官屬考察失實勘合怠於完銷盜賊疎於督捕欲其剷除吏弊甦息困窮以安黎庶保固地方蓋亦難矣查得正德四年七月內爲缺官分巡事該吏部會官議擬奏准湖廣布政司添設管道右叅議一員張瀚後因緣

事隨補徐潭陞任久缺議者必謂官多民擾
不若裁省爲便切惟天下利害當權重輕若
害倍於利者什百則當惟害是去利倍於害
者什百則當惟利是從且如添設一員不過
阜俸馬夫等項所費有限其害甚微使各官
巡歷於外分理政務潤澤生民其利博矣二
者相較奚啻什百倍蓰而已哉如蒙乞

勅該部從長計議合無查倣前例照舊添設右叅議
一員分守一道地方庶幾吏飭民安澤不問
於遐邇而人存政舉職不至於瘝曠矣

改兵備以兼分巡照得湖廣上荆南道地方
西連巴蜀南極瀟湘東抵吉袁西轄九永延

袤數千餘里水陸四望皆通軍民雜處於封疆

宗室森羅於郡治施州九谿等衛又有土官衙門地各異俗人各異心況邇年以來水旱頻仍盜賊竊發獄訟繁興文移旁午比之別道事最繁重雖有守巡官員常居省城巡歷難遍荆瞿守備名位頗輕以此人多玩習事鮮克濟議者或欲添設省分或欲添設巡按蓋皆有見於此但一國三公十羊九牧似非政體所宜臣愚以爲合無比照浙江溫處廣西右江事例將本司分巡官員改爲兵備副使或僉事領

勅一道就於荊州駐劄控制一方仍兼理分巡修理
城池操練軍馬防捕盜賊問理詞訟消奸人
窺伺之心造生民昇平之福如此則官不必
添設而事體得宜地方亦可保固矣如蒙乞
勅該部會議如果相應依擬施行實爲便益

一改巡司以嚴保障切惟巡檢之職專爲督捕
盜賊控扼要害而設照得湖廣德安府所屬
隨州梅丘鎮巡檢司距州五十餘里地方偏
僻不當衝要之區吏卒安閒不脩捕詰之責
殆非

朝廷張官置吏初意看得該州北去三十里地
名厲山店東抵應山縣九十里西抵棗陽縣

一百四里南抵安陸縣一百三十里北抵河南唐縣三百里軍民雜居商賈交集誠爲該州直北襟喉要地先年去任知州李充嗣在彼設立社學鋪舍公廨廳房將以潛消强悍之習預防姦宄之萌立意甚善至今遺構尚存合無將前項巡司改設於此不勞民之力不匱民之財而官吏得以盡其職盜賊無以匿其踪矣緣係遷移衙門地方事理未敢擅便乞

勅該部議處行臣遵奉施行便益

一具屯冊以杜侵欺切惟開屯種以廣儲積造文冊以備考我

朝養兵之法可謂周悉詳盡矣奈何法立弊生
歲久事廢今屯田之名雖存而屯田之實幾
盡何者卽今湖廣衛所屯田古冊多稱遺亡
間有存者取而叅對近冊條段坐落俱各不
同固有古冊在此鄉今在彼鄉者亦有舊止
一段今爲數段者豪官肆其侵謀軍士受其
威賂展轉兼併夤緣移換遂使膏腴者盡入
於勢豪之家硤瘠者存留於版冊之內日侵
月削逃棄拋荒先今糧額相去甚遠間有故
老相傳深知其弊舉而首告竟莫剖決蓋以
文冊不存故也爲今之計合無行移南京戶
部備查洪武永樂年間下屯古冊及正統八

年興舉屯種文冊收藏所在就令缺冊衛所
動支公用銀兩選委能幹官員前去抄謄每
冊一樣三本一留布政司一留按察司屯田
道一發該衛所各另收貯以備遺亡則典籍
常存經界可正下之受害者有所憑而赴愬
上之聽理者有所據而剖決而又叅以軍職
止許存留三分之例嚴強占私買私賣之禁
庶屯政漸修而屯田漸復矣如蒙乞

敕該部計處施行不勝幸甚

一查坍墜以均利害謹按湖廣地方江漢巨浸
派別於荆沔之地會合於蘄鄂之間迤邐不
啻千里水急上疎激盪所嬰無不崩壞但求

冊西墜理勢之常而沃壤洪流變遷靡定被害之家持東冊西墜之說得利之人有連址接壤之便爭論不已奸蠹乘隙因而投獻勢要軍衛有司莫敢誰何貧軍小民破家陪貲卒至逃亡後已查得先該巡按直隸監察御史楊邦禎建議要行差官將勢豪侵占新洲先年不係

欽賜及起科者查明悉令退出轉行各該衙門將連年冊江田土查勘明白量撥一二以蘇貧軍該部議擬沿江上下賊盜往來差官踏勘不免勞擾待地方寧靖再議迄今未行臣愚以爲給淤墜以補冊塌法雖甚善勢則難行大

江限隔動涉異縣誰與耕種爲今之計合無
差委的當官員分投丈量起科糧米計其多
寡量爲除減坍江之數則糧額不至於損少
利害亦得以調劑矣如蒙乞

勅該部查議果無窒礙早與施行其於地方軍民不
無小補

一處軍職以警奸貪照得湖廣都司所屬沅州
靖州銅鼓伍開平溪清浪偏橋鎮遠施州永
定九谿瞿塘等邊衛指揮生長夷方與之俱
化以培克爲家法視軍士如草芥官日富而
軍日貧財益聚而人益散及至事發或散行
拘審或叅奏行提有等豪富兇頑官員公然

不理強奴悍僕數十成羣差人不敢瞰其門
委官不敢當其怒方且謀害原告假以他事
爲名或一旦扭錄置之牢獄或百計羅織逼
之逃竄時移日改旋生狡計縱然賄賂無門
不免囑託有路以此軍士敢怒而不敢言寧
死而不肯赴愬如九谿衛指揮李玉壘塘衛
千戶文玉姦貪獷悍稔惡數年事發桀驁自
如叅提延久方出舉此一二則其餘可知矣
查得問刑條例內一款文武職官犯罪事發
脫逃者除真犯死罪并例該充軍照本等律
例問擬外雜犯死罪并徒流罪俱問發爲民
原該爲民者發口外爲民看得前項不服官

員其情甚於脫逃合無比照前例分別差等
凡軍職犯罪事發拘提除患病公差勘有實
迹外其犯該雜犯死罪并徒流罪若無故抗
違至三月之上杖罪以下例應還職無故抗
違至半年之上者俱照前例爲民如蒙乞
勅法司查議施行庶兇頑知警獄訟易清邊境窮軍
庶乎有生意矣

一作興衛學以求人材照得湖廣都司所屬銅
鼓偏橋九谿永定等衛設有儒學俱係軍武
生員肄業竝無廩膳增廣其間或三年一貢
二年一貢照依入學先後次第起送切照本
朝取士專用科貢二途今府州縣學歲貢以食

糧爲次已非

祖宗立法初意然貢之論食廩猶官之論資格任法而不任人固後世所不能免今衛學止以入學先後爲貢之次第似非法之良者以此有口尚乳臭卽寄名在學以圖早貢邊衛子弟考較多從寬假則是

朝廷官職可以坐得古人有言一命之士苟存心於愛物於人必有所濟反而觀之一命之士苟存心於利已於人必有所害夫以有司而爲

朝廷歲貢一人宜不得若是草草也且考其文行而授之餼廩俾無衣食奔走之累得以專

心致志於學如使由此而得真才升斗之費固所不惜且軍武生員旣可以貢又可以官而獨不可與之廩乎卽今湖廣施州衛貴州興隆衛等學俱有廩膳事同一體教無殊科況今銅鼓偏橋等衛學生員頗盛惟是邊境孤城實多貧窘及查得平溪衛先年軍生附於貴州思州府學比因上官劉襲

奏要另設儒學行臣勘處相應已經回報都察院轉咨禮部未見舉行合無將銅鼓等衛儒學軍生比照縣學則例廩膳增廣各二十名其廩米於衛倉支給提學官務要嚴加考試取其文理頗優者方許補廩應貢不許姑息

俯就及查先行事理將平溪衛一體建學食廩如此庶生徒免飢寒之累有司盡貢舉之責而邊方文風可望興起矣如蒙乞

勅該部從長議處斟酌施行學校人材不勝幸甚

一遷革驛傳以協人情夫驛館之設居水陸交會之中係應接往來之地可遷則遷可革則革皆民便也查得沔陽州原設漢津候埠沙湖則河深江伍驛往年奉例歸併當時有司失於相度倉卒呈報將到河驛革去改作景陵縣所屬乾灘驛存留前項四驛今看得則河地方南至沔陽州北至景陵縣相去各一百餘里西至潛江縣七十餘里較量道里于

此適中經過官員于此憩息其見在深江驛
離沔陽州及景陵縣皆一百餘里離潛江縣
止二十餘里又僻在則河之北邇年以來河
道壅塞舟楫不通實爲閭閻署合無將深江驛
裁革移在則河地方仍復則河舊驛夫馬通
移不勞重覆編派舊址猶在不煩浩大工程
此以遷改爲便者又查得襄陽府光化縣鄴
陽驛原係新設衙門上自均州下通襄陽止
是一帶水路又光化縣里分數少官員不係
全設鄴陽驛夫馬供應俱是該縣出辦蓋名
有而實無也相應裁革聽其夫馬答應總歸
於縣此以革去爲便者叅訪兩處官員兼以

二司巡歷衆口一詞皆稱利益因革之道亦存乎時揆之政務若不關於重大之體而度之人情亦足以爲便利之圖如蒙乞

勅該部計議相應無礙行臣如擬施行地方幸甚

一慎選巡檢以嚴捕詰照得天下設立巡檢司官所以盤詰奸細緝捕盜賊果能舉職是亦要官我

朝舊制相承往往以倉場稅務等官陞除或以三考年深吏典選授及至上任俱年六十左右皆心志灰頽精力衰憊動以歸老自盡平居則竊祿苟延遇警則閉門畏縮指麾操縱悉出吏牌及其子弟之手或容妄拿平人攀

害良善或圖得匿贓賄賣放真盜千百之中
鮮有一二自能策立者所以額設弓兵皆爲
官衙廝役甚至收納月錢縱令閒曠巡邏緝
捕漫不究心此豈

祖宗設官之初意哉矧湖廣地方山澤綿延江湖深
闊巡司分設獨多盜賊不時竊發前項官員
關係尤切如蒙乞

勅該部會議合無今後遇有巡檢員缺不必照常將
倉務等官陞補許於吏員中該選前職并揀
選急選八品行頭出身情願告就前職者數
內挑選人物精爽年力强壯之人除授前職
令其到任守法奉公脩舉職業盤詰奸細緝

捕盜賊獲功呈報合于上司撫按等官一體
獎勞保舉吏部不次陞用如此則本官自恃
尚有向進之期而官司委任亦有責成之效
奸宄庶可消弭而地方獲賴無虞矣

一協操守以固省城照得湖廣省城設有武昌
衛武昌左衛官軍操練保障其武昌護衛專
屬

楚府護守

王國平時既無統攝之司遇警又無協濟之力
酌量事體甚非所宜且省城原有九門地方
其各

郡王將軍儀賓府第參錯鱗次却居其五而諸

司衙門與軍民之家止居其四今春儀賓沈寶府內被賊劫害緣其第宅在大城之東空曠去處實隸武昌護衛管轄攷其軍士雖多分派各府不過聽其樵採役使之勞初不責其暮夜巡警之備省城盜發事頗異常凡在守土官員固不能遁失事之責而思患預防亦當爲善後之圖查得武昌護衛官舍旗軍約四千一百餘員名每歲食糧不下三萬三千餘石除西安州養馬牧羊之外在衛尚有三千五百餘員名又有儀衛司官校俱無征運雜差專一防護

王國正德七年爲因流賊入境行取護衛旗軍

一千餘名防守城池後因地方稍寧昭舊不用夫居重馭輕天下之勢當審其所在而處安思危智者之見常防於未然爲今之計合無將武昌護衛官舍軍餘照舊查選一千員名與武左二衛官軍舍餘相兼操守俱聽考選城操都指揮號令約束隨時訓練遇警併力防勦其

楚府長街并端禮等門周圍牆外及楊柳壩一帶曠野處所近日已令添設鋪舍一十三座輪撥護衛軍餘每夜守宿巡警誠恐日久又生怠玩必須按察司按月委官不時稽考查點如此庶幾地方城池有統攝保固之益而

護衛官軍免虛費閒散之弊矣如蒙乞

勅該部查照計處著爲定例永遠遵守其餘

襄遼荆吉等府凡有護衛并儀衛司去處聽臣
督令守巡等官一體查處施行地方幸甚

欽差巡撫湖廣地方兼贊理軍務都察院右副都御
史秦 題爲對陣擒斬越境苗賊功次事據湖
廣按察司分巡上湖南道帶管郴桂衡永等處
兵備僉事高顯呈據守備永道以都指揮體統
行事指揮僉事王廷爵手本前事奉巡撫湖廣
右副都御史秦 案驗爲預防盜賊以安地方
事訪得廣西府江等處見有猺賊作耗勢頗猖
獗切照湖廣江華錦田等所縣正與彼省富實

等縣境界相連誠恐前賊奔逸我境為患相應
預為隄備除與鎮守湖廣地方御馬監太監杜
甫總兵官楊英巡按監察御史張翰會議外案
仰本職即便嚴督該管軍衛有司掌印巡捕巡
司哨守等官整朔官軍民兵殺手更夫人等嚴
守關隘保固城池一面選差乖覺人役爪探賊
情遇警督率官兵相機截殺獲功呈報以憑施
行仍備行湖廣按察司分巡帶管郴桂兵備僉
事高顯知會等因奉此除通行永道寧遠府州
衛掌印知府何詔巡捕通判賀位知州洪通指
揮王臣等一體轉行所屬嚴謹防範外又經選
差乖覺緝事健步李慶五等前去錦田等處地

方爪探賊情嚴督哨守官軍把截關隘本年七月十四日據原差李慶五齎到哨守指揮洪基飛報七月十二日寅時據健步盧馬兒款丁莫文廣等報稱連山賀縣苗賊約有五百餘徒開張旗號越來攻打萬安寨殺死民人李瀛男婦等苗賊見今在彼剗住等情據報到職隨統千戶曾顯許鐸百戶王憲各項精銳官軍并千長李梁義官李椿等及款夫人等會合前到萬安寨分布奇正軍款對敵數合至本日午時衆賊衝陣當有軍款嚴仲六李燁李丑生等奮勇向前斬獲賊級六十七顆生擒賊二名奪獲兇器二百餘件殺傷賊徒數名

軍款粘踪追

捕去訖被賊殺傷百戶王憲左手并傷官軍數
名俱各存命等情據報到職緣係行仰遇警督
率官兵相機殺賊獲功呈報事理合行開報等
因到道據此除將解到賊級并生擒賊犯紀驗
明白取具招由脫逃賊犯仍行守備等官王廷
爵等通行嚴督各該州縣并各哨所堡巡捕巡
司官兵人等粘踪追勦另報外今將所獲功次
理合開坐呈乞照驗施行等因到臣據此案照
先爲截遏追殺渠惡賊黨功次事該守備指揮
王廷爵呈報正德十一年二月二十七日督率
官兵人等前去藍山地方沂村等洞斬獲過強
賊首級并生擒共四十五名顆已經會本具

題外續爲預防盜賊以安地方事該臣等訪得廣西府江等處見有搖賊作耗勢頗猖獗誠恐前賊奔逸我境江華錦田等所縣爲患又經案仰守備指揮僉事王廷爵即便整飭部下官兵人等嚴謹把截相機防勦去後今據前因臣會同鎮守湖廣地方御馬監太監杜甫總兵官都督同知楊英巡按監察御史張翰議照湖廣錦田等處地方近被兩廣連賀等縣苗賊越境爲患殺虜人財守備指揮僉事王廷爵乃能遵奉明文督屬擒斬賊級勞蹟頗多誠可嘉尚其帶管兵備僉事高顯亦克用心調度獲有前功除批行該道將生擒賊犯問罪具招呈詳賊級梟掛

示衆及將未盡賊徒相機勦捕外如蒙乞

勅兵部查照將前項獲功官員并軍款人等照例議擬陞賞如此則人心知所激勸地方賴以安寧不勝幸甚緣係對陣擒斬強賊功次事理臣等未敢擅便爲此會本正德十一年八月二十八日順差承差李蘭華親齎謹題請

肯

欽差巡撫湖廣地方兼贊理軍務都察院右副都御史秦 題爲乞

天恩甦民困計處錢糧以濟兵荒急用事據湖廣布政司管糧右叅議熊紀呈爲乞憐水災民患事緣報勘過荆襄常岳武漢黃德安沔等府州衛

并所屬水災文冊前來看得安陸沔陽漢陽漢川景陵石首公安監利潛江華容安鄉沅江龍陽等四十五州縣災重者十分以下輕者四五分以上共該無徵秋糧米四十三萬八千三十二石八升八合八勺六抄八撮四圭八粟淦死人口一千四百九十五口漂流瓦草房屋七千六百六十三間及據前項州縣衛所申稱查得各該倉庫空虛錢糧缺乏無以賑濟卽今人民缺食饑餓難存壯健者糾集搶奪老幼者竄徙流移地方危急勢難保安乞賜別爲處給錢糧以救民命消弭盜賊等因據此行間隨准兵部咨該巡按監察御史張翰等題據叅將洛忠等

呈爲十分緊急賊情狀苗數萬晝夜謀討攻打
城堡人命倒懸急請兵糧懸望解圍事奉

聖旨兵部知道欽此本部議擬覆題奉

聖旨是地方苗賊猖獗著湖廣總兵官楊英都御史
秦金前去湖貴接境去處會同貴州鎮巡官督
同各該叅將守備三司等官整備兵糧相機撫
捕如果事情重大隨宜會調各省官軍土兵協
力征勦不許自分彼此失誤事機仍著貴州巡
按御史隨軍紀驗功次都寫勅與他其餘事依
擬行欽此又准本部咨該巡撫貴州右副都御
史曹祥題爲十分緊急賊情事奉

聖旨該部便看了來說欽此本部議擬覆題奉

聖旨是這處置用兵事宜恁每議處停當都依着行
欽此欽遵備咨前來除會行都布按三司及各
道守巡叅將兵備守備等官查照一面爪探賊
勢緩急飛報一面整備兵糧聽用臣等候

勅至之日即便啓行前往湖貴接境去處約會貴州
鎮巡官從長計議相機撫勦外臣惟湖廣地方
頻年災盜之餘委的軍民因弊之極本等糧差
之外加以坐派各項物料數多又因營建採運
大木公帑之錢糧搜括無遺百姓之脂膏剝削
已竭今值重大水災邊方用兵緊急安內攘外
皆臣之責顧此失彼實臣之憂切念前項被災
州縣衛所軍民人戶目前老幼缺食已多餓死

流移計口給賑必得米穀三四十餘萬方可支
持臣已通行先儘預備倉糧支給而人多糧少
不穀百分之一繼此冬春之交無所仰給饑寒
迫身相聚爲盜必至日滋月長意外之患殆有
不可測者況貴州征苗議調湖廣土漢官軍三
萬員名前往清浪偏橋等處住劄難以月日預
計彼處邊倉空虛主兵亦不穀用至於賞勞銀
牌花紅魚鹽等項必得銀數萬兩米十萬餘石
僅可供億此蓋急於星火不可時刻遲誤臣以
非才濫膺重寄夙夜焦勞不遑寢食前此雖嘗
一面嚴督該道守巡管糧管屯等官催併應解
邊倉錢糧上緊完納一面動支庫貯官銀一萬

兩給發分守叅議王蓋糴糧賑濟本官近又陞
任倉卒豈能濟事臣今查得布政司廣備庫見
在惟有一項生員納銀共三萬九千九百八十
兩例該解送戶部及存留採木之用堪以借支
臣只得擅便行令該司動支二萬四千四百三
十兩責付接管分守叅政張天相領運至辰常
等府分撥委官設法糴糧運赴邊倉接濟或量
留本色間日折支外一萬五千五百六十兩解
送分守叅議張漸副使聶賢并管糧叅議熊紀
等查發極災沔陽漢川等州縣驗口給賑此項
銀兩似應還官至於災傷蠲免稅糧俱是存留
之數奈何

王府祿米文武官吏旗軍俸糧皆不可缺況本處
歲用項下原欠米一十二萬九千有零故官軍
本折色俸糧有八九月不得關支者有二三年
無從補給者衆口嗷嗷朝不謀夕亦須及時區
畫若夫征科繁擾民命倒懸尤宜急解臣晝度
夜思別無善策茲欲拯溺救焚必須損上益下
以權濟經革無名之科斂停可緩之催征庶幾
有補今將各項事宜逐一計處一日那見在以
濟緊急二曰停催併以拯顛危三曰復舊規以
收羨利四曰開事例以補匱乏備開條件冒昧
上

陳伏望

皇上畏天命而憫人窮念兵荒以急儲餉

特勅該部從長會議俯賜采擇施行庶可以少濟目前燃眉之急而日後噬臍之悔或可苟免矣緣係乞

天恩甦民困計處錢糧以濟兵荒急用事理未便擅便為此具本正德十一年九月初四日專差承差張拱極親齎謹題請

旨

計開

一曰那見在以濟緊急

一查得湖廣布政司廣備庫收貯專任巡撫防禦虜寇以保安地方事生員銀二萬四千四

百二十兩見該戶部查取給邊又該工部侍郎劉丙奏爲營建

宮室以計留錢糧事添納生員銀一萬五千五百六十兩預備採木臣已便宜借支餉軍給賑二項銀兩合無將該解戶部之數准用免還惟復與採木備用者通候開例銀兩償補乞

勅該部查照定奪示下施行

一訪得湖廣均州

大嶽太和山各處商賈軍民人等每歲燒香布施銀錢等項不下萬計爲因不報合于上司無憑稽考的數臣惟此項錢糧修理官觀之

外相應糴穀備賑臣近因水災民困至極不
得已行令該道分守叅議張瀚撫民副使聶
賢轉行分守太監梁英呂憲那借銀一萬兩
給發災重州縣賑濟未報誠恐所司罔念民
艱隱匿占恡如蒙乞

勅該部查照行令各官一面量借見在之數急救民
命一面著爲定例今後每年收受香錢務令
提督叅議管理比照山東泰安州事例按季
報數若干內留三分之一修理宮觀其餘送
布政司貯庫預備賑濟及撥補俸糧等用實
爲便益

二曰停催併以拯顛危

一戶部額辦坐派未完錢糧除正德七年以前遇

赦蠲免外其三德八年九年十年小民拖欠夏秋稅糧子粒及一應戶口鹽鈔乾魚蓮肉黃蠟葉茶茱筭等料見今併徵民甚困累如蒙乞勅該部斟酌議處內除起運兌軍京庫折糧銀兩不拘有無災傷州縣照舊催徵完納外其存留本處倉糧撥運

王府祿米及解京鹽鈔物料等項合無將災傷去處暫且停徵無災去處亦從寬比併先完正德十年之數內有侵欺者仍查究監併實爲便益

一工部額辦坐派未完錢糧除正德七年以前遇

赦蠲免外其正德八年九年十年小民拖欠段疋胖襖軍器等料各

王府墳房婚禮料價并新派綾紬錦營建均徭帶徵解戶水手盤纏紗綾紙劄銀兩見今併徵民甚困累如蒙乞

勅該部斟酌議處內除營建帶徵解戶水手綾紗紙劄等銀不拘有無災傷州縣照舊催徵完納外其餘軍器胖襖船料并

王府房墳等價新派綾紗紙劄紬錦等銀合無將災傷州縣暫且停追以甦民困候豐年另

議帶徵無災去處亦從寬比併先完正德十年之數內有侵欺者仍查究監併實爲便益一湖廣鎮守衙門每年進

貢鱖鯉魚鮓其魚并椒料等銀俱取之於各河泊所及派各州縣水手銀兩民已不堪此外又有葛布等項名色不時差人下屬收買挾勢射利之徒因而恐嚇取財閹茸貪濫官員從而奉承科歛奸吏通同里書收頭剋剥花戶以一科十公少私多民困益滋無所控籲凡此無名之征誠宜嚴禁痛革乞

勅該部查照議處合無行令湖廣鎮守衙門遞下止進鱖鯉魚鮓用盡敬

上之誠仍聽臣與巡按御史督同司府官員會計合用鱖鯉等魚若干駕船水手衣糧銀兩若干作何出辦計處停當著爲定例免致分外科害其餘葛布等件及各項無名之征一切禁絕今後如有奸貪小人假名怙勢潛往繁屬州縣衛所需索財物騷擾地方者許所在官司即便擒拿解送撫按衙門臣等從重治罪民生幸甚

三曰復舊規以收羨利

一查得正德元年爲缺乏銀兩庫藏空虛事該太監蔡用等題

准將天下各

王所奏計山場湖蕩稅課司局河泊所通令還
官徵銀解用今照湖廣所屬如武昌荊州等
府稅課司湘潭東山崙等河泊所見該

楚遼吉壽等府照舊營業且令該府內外官員
人等收課挾勢射利多科橫取軍民受害莫
敢誰何是故利多歸於小人名寔損乎

宗室況今各府將軍儀賓往往申呈久缺祿糧
多係遇例蠲免若再追併小民是驅之爲殍
爲盜也如蒙乞

勅該部查議合無將湖廣各

王府先年奏計稅課河泊并山場蘆洲田土等
項行令臣與巡按御史坐委守巡等官逐一

查出照舊還官徵收銀兩就補先今欠缺各府

郡王將軍郡縣主等位下祿米并官校月糧不許別項支銷候年時豐收地方寧謐另行議處奏

請定奪

一訪得湖廣省城各處鹽商輳集鹽船到於江上先年俱赴武昌府掛號給帖執照發賣每船一隻納銀二三兩入官貯庫以備賑濟等項公用蓋亦古人所謂與其取之于民孰若取之商賈之意人心已定別無異議正德三年有去任知府陳梅朋奸附勢投獻此利于

鎮守衙門馴致趨利小人承攬巡攔因而攪
取每船勒要銀五六兩以上每歲不下萬計
迄今久假不歸遂使商民俱困深爲未便如
蒙乞

勅該部議處合無今後各處鹽商到於江上仍令遵
照舊規俱赴武昌府掛號每船納銀二兩或
三兩收貯官庫登記印信籍簿按月開報撫
按衙門備照布按二司掌印官不時稽考其
銀預備賑濟及賞軍等用不許官吏人等藉
赴侵漁重困商民違者拏問叅究

四曰開事例以補匱乏

一各處鹽課專備兵荒查得湖廣先年亦嘗開

中引鹽以備軍餉只今邊方倉米告空主兵
月糧尚缺見調漢土官軍數多倉卒無所仰
給豈不誤事惟有召商中鹽謂之飛糧可以
濟急如蒙乞

勅戶部俯念軍餉緊急查將兩淮運司各年存積等
項墮課開中二十餘萬引斟酌定議價直行
令湖廣布政司出榜召商照依時價定與斗
頭俱赴偏橋清浪等倉上納糧米以供軍餉
完日給與倉串實收關領引目赴場支鹽誠
恐各商畏避邊路險遠內將一半姑准赴司
納銀給發郴桂用兵供給之用地方幸甚
一查得近例湖廣布政司所屬各儒學生員許

令納銀廩膳二百兩增廣二百八十兩附學
三百四十兩俱赴本布政司上納准其入監
肄業出身今已停止緣此例人多樂趨得銀
可以濟急如蒙

皇上軫念民命倒懸邊儲緊急乞

勅該部會議從權合無再於本布政司開納三百名
照例赴司上銀給文起送如數不穀許於附
近南直隸府屬儒學撥補其銀照數補還官
庫解部并採木之用餘剩銀兩却將轉給軍
餉賑濟飢民地方幸甚

一查得舊例在外都布按三司知印承差見役
一年半以下者承差納銀六十兩知印納銀

七十兩聽缺三年以下者承差納銀一百二十兩知印納銀一百五十兩六年以下者承差納銀一百一十兩知印納銀一百三十兩六年以上者承差納銀九十兩知印納銀一百一十兩俱起送赴部承差就撥辦事知印冠帶聽選今已停止合無許令湖廣都行布按四司知印承差仍照例納銀起送施行一查得舊例在外各衙門吏典初考一年以下者納銀一百二十兩二年以下者納銀一百一十兩三年以下者納銀一百兩轉考一年以下者納銀九十兩二年以下者納銀八十兩三年以下者納銀七十兩俱起送吏部免

其辦事考試就撥當該其聽缺農民三年以上者納銀一百兩免其在外歷役各照原擬衙門起送赴部辦事今已停止合無許令湖廣大小衙門見役吏典并候缺農民仍照例於本布政司納銀具結起送施行

一查得舊例各衛所軍職襲替指揮千百戶等官未經比試者總小旗未曾併槍者許令納銀指揮五十兩千戶鎮撫四十兩百戶所鎮撫二十兩總旗十兩小旗五兩各赴本處司府納完免其赴京比試併槍給與庫收申繳兵部查考今已停止合無行令湖廣都行二司所屬官旗照例施行其見調在邊并附近

衛所就赴清浪偏橋等倉照依銀數時價買米上納寫遠去處俱赴本布政司納銀各免其赴京比試併槍給與倉收備照仍繳兵部考

查得舊例各處軍民舍餘人等有願納銀一百五十兩者授以百戶所鎮撫二百兩者授以副千戶二百五十兩者授以正千戶四百兩者授以指揮僉事四百五十兩者授以指揮同知五百兩者授以指揮使各於所在官司告報納銀完日造冊并庫收繳送戶部查對明白轉行兵部印給劄付填註衛所帶銜間住徑發原納銀官司照名給發執照今已

停止合無行令湖廣布政司召令本省并各處軍民舍餘人等仍照例納銀施行

一查得舊例在外陰陽醫學并僧道官有缺許令陰陽醫生僧道或仕宦子孫良家子弟年歲相應者各納銀六十兩起送吏部入選免其考試候缺者減去銀一十兩今已停止合無行湖廣布政司查舉前例納銀施行

一查得舊例各處儒學不願出仕生員及兩考吏典不願赴京辦事者許其各納銀二十兩給與冠帶榮身有司以禮相待免其雜泛差徭今已停止合無照舊行令湖廣布政司所屬府衛州縣學生員并各衙門兩考吏典不

願出仕辦事者俱照例赴司納銀給與冠帶
劄付執照

已上事例八條內除開中鹽課生員納銀乞定
與數目外其餘合無姑以二年爲期如果歲
時豐收地方寧靖就便停止